



## محمود الطواني - شقيق الوجد

محمود عطية أحمد

اسم الشهرة : محمود الطواني

مواليد : ١ / ٦ / ١٩٩٤

محل الإقامة : مدينة القرين - محافظة الشرقية

طالب جامعي

شاعر عامية ، نشر في عدد من الصحف الإقليمية ،

مثل عيون الشرقية نبض الوطن .

شارك في ديوان تحت الطبع ، تابع لقصر الثقافة

بالشرقية .

للتواصل: Mahmoud\_20107710@yahoo.com

الإهداء ..

أهدي هذا الديوان إلى والدي ووالدتي ، وإلى إخوتي

وأصدقائي .

## أخويا



مش هقدر أكمل مشوارك  
 ف سامحني خلاص لما أبيعك  
 دا وطننا خلاص فرق بيننا  
 ما بقاش بيساعني ولا يسيعك

سامحني خلاص لما أتنازل  
 معادشي خلاص فيه محاولة  
 دا وطننا خلاص سلم نفسه  
 ف هاسلم أمرنا للمولى

ف سامحني خلاص لما أتنازل  
 واستسلم من أول جولة

## هكون لك حياة



هكون لك حياة وأعيش بس ليكي  
 ورغم اللي باعوا .. أنا مشتريكي  
 هكون لك حياة  
 وهفرد ضلوعي مراكب لشطك وبر النجاة  
 هكون لك حياة  
 وهزرع ف حزنك أحلى ابتسامة  
 وهمسح دموعك  
 لا بد من رجوعك يا أحلى صبية  
 يا ضي العيون  
 عشانك يا غالية أضحي بحياتي  
 عشانك أكون  
 عشان قلبي عاشقك وعشقك جنون  
 رح أفرش دروبك بكل الأمل  
 رح أصبر عشانك كصبر الجمل  
 عشان ساكنة فيه ما هوش محتمل  
 أسيبك ف جرحك  
 لا بد إنني أصلب أيادي الطغاة  
 وأسطر بموتي لقلبك حياة

لا بد انتصارك على كل عتمة  
ويشرق نهارك ف كل الوجود  
عشانك يا غالية أضحي بحياتي  
ما شوفش انكسارك  
عشانك أموت  
ولا ألمح ف عينك نواحك عليه  
تعيشي يا حرة .. يا أجمل صبية

## ذكريات الوجع



صورة ف برواز  
 ف قلب متعلق  
 وذكريات الوجع  
 دايرة وبتقلب  
 ونار الجراح قايدة  
 والقلب لسه حزين  
 مع إنه فاتني وباع  
 ومهاجر بقاله سنين  
 لكن حنين غلاب  
 صاحب ف دربه كلاب  
 لا تشوف معاهم حب  
 ولا ترسى في يوم على بر  
 تزرع وروذك تلقى  
 جاني دمار وعذاب  
 ولسه الهوى مسجون  
 ولسه القلب محتار  
 إزاي عليه أنا أهون  
 وإزاي سايبني ف نار

إزاي في يوم كان حب  
إزاي في يوم كان ود  
إزي أكون بناي  
إزاي يكون بيهد

ولسه الحنين غلاب  
ولسه القلب مش تاب  
نار الجراح بتصيب  
مهما قفلت أبواب

ياهل الهوى دلوني  
إزاي أداوي الجرح  
ياهل الغرام دلوني  
إزاي ألاقي الفرحة

لقيت الجواب بيقول  
أصل الهوى كداب  
يا تقاسي كتير من حبك  
يا إما غياب بغياب

## تايه دليلي



ما لقيتس ملة  
تحكم ف شرعك  
ولا حتى دليل  
يوصل ببر

ما بقيتس نافع  
أصلح لفرحك  
ولفرحي حتى  
ما لقيت ممر

تايه دليلي  
وتايه ف قربك  
حتى ف بعدك  
بأسى مر

سبتيني تايه  
معجون ف ليك  
وقطر عمري  
عدى ومر

ما بقيتش قادر  
ألملم بواقى عمري اللي راح  
حتى دوايا مبقاش بينفع  
لكنه ضر

كل اللي باقى شوية بواقى  
ناري اللي منك  
وكل اللي فاضل  
ما لقيتس فيه حاجة تسر

## ياما قالوا لي



ياما قالوا لي الناس  
 ما تكونش ف هواه مفتون  
 أصل الهوى كذاب  
 ياما ف براحه سجون

مهما هتاخذ منه  
 ترجع أكيد خسران  
 مهما كسبت قلوب  
 ترجع أكيد مديون

ياما قالوا لي الناس  
 بحر الغرام غدار  
 مهما ف جنة تعيش  
 برضو خاتمها بنار

لازم سايب لك بصمة  
 هتعكر المشوار  
 تصبح ف بحر ه غريق  
 وتشوف عذاب ومرار

وإن جاك ف يوم ارحل  
خليك بعيد ع الشط  
خليك خفيف تعوم  
يا تكون غريق ف بحار

ياما قالوا لي الناس  
ابعد بلاش تحتار  
يا ما قالوا لي الناس  
ابعد بلاش تحتار